

Sin ils fastizs d'Armon Planta

Excursiuns sin veglias vias alpinas da traffic

DA GUIU SOBIELA-CAANITZ

■ **Ins na po betg scriver in'istorgia spiertala grischuna davart la segunda mesadad dal tschientaner passà senza menziunar Armon Planta (1917–1986). Motivs datti plis; il principal, renconuschì dal mund academic, è stà sia activitad d'archeolog en connex cun «vias da traffic istoricas».** Per sia lavur e metodos da pionier ha el survegnì il 1986 il dr. h. c. da l'Univ[ersitad] da Berna» (1). In mess da la facultad è vegnì a Sent per surdar il diplom en tutta furma a Planta sin ses letg da muribund. El «ha pussibilità tesas novas davart il trassé da las vias en Grischun, damai ch'el enconuscheva fitg bain l'intschess. Plinavant ha'l scuvrì construcziuns complementaras e galarias en tschancuns fitg spezial, sco per

exempel sin la Viamala, permettend d'als datar dal temp roman (...). Insaquants chats da parts da chars (...) e da garnituras da cumet provegnan directamain dal traffic stradal» (2). Planta integrava sia famiglia tar sias retschertgas. Suenter sia mort ha il figl Tumasch (3) perscrutà vias veglias sin il Pass dal Spleia e rapportà en chaussa en il volum che cuntegneva era l'essai dal bab davart la strada romana sin il Pass dal Bernardin (4). La mamma d'Armon era ina Gualsra da la Valragn; perquai enconuscheva'l bain l'intschess. «Las vegliandras vias dal Spleia manavan [encunter Clavenna], d'ina vart tras la chavorgia selvadia dal Cardinel, da l'autra vart sur il precipizi de Scien tranter Pianazzo e Campodolcino. Là ha Tumasch Planta pudì scuvrir in tschancun da via construì a moda straordinaria» (5).

Pass e chavorgias tranter Cuira e Clavenna

Questa stad arranscha Planta trais excursiuns da mintgina dus dis e mez sur il cunfin per 4–8 viandantas e viandants da gronda experientscha (fin quatter uras da marsch), cun marena e buns chalzers da trekking. Ins parta da la staziun da Tusaun a las 13.45, il venderdi 20 da zercladur, 8 d'avust u 12 da settember, dorma la saira a l'Hotel Roflenschlucht d'Andeer e la sonda saira a la Locanda Cardinello d'Isola (1280 m) en la Val S. Giachen. La tura dal venderdi maina tras la Viamala, quella da la sonda tras il Cardinel, quella da la dumengia sur Scien fin a Campodolcino (Val S. Giachen). Il transport cumpiglia tschancuns cun traffic public e cun taxi (6). Planta porscha era quatter excursiuns da mintgina in di per 4–8 persunas

sin ils pass dal Güglia e da Malögia: Dumengia 15 da zercladur, venderdi 22 d'avust, sonda 20 da settember e venderdi 3 d'october. Questa tura cumpiglia var trais uras da marsch. A las 08.35 as parta da la posta da Silvaplana cun marena ed equipament da viandar. Il pretsch è 80 francs per persuna; per gruppas pli grondas datti pauschalas per di. Tiers vegn il pretsch dal viadi cun traffic public fin sin il Pass dal Güglia ed enavos da Malögia. Inscriziun en scrit u per telefon, il pli tard dus dis oravant tar Planta (v. nota 3), tar «Sils Tourist Information» (7514 Segl, telefon 081 838 50 50; sils@estm.ch) u a 7435 Spleia (telefon 081 650 90 30; info@viamala.ch). Planta empermetta: «Tar las excursiuns prevesidas duai il giast sa far in'idea da la lavur che la perscrutaziun da vias pretenda ed admirar sez ils stgazis dals chats

als lieus ed en archivs, cumpagnads d'infurmaziuns or da domenas parentadas.»

1. Clà Riatsch en: *Stiftung Historisches Lexikon der Schweiz (HLS), Lexicon Istoric Retic, tom 2. Cuira (Desertina, ISBN 978-3-85637-391-7) 2012, p. 166, chavazzin «Planta, Armon».*
2. Jürg Rageth en: *Pro Grigioni Italiano, Cuira, ed Edizioni Casagrande, Blinzuna (ed.), Storia dei Grigioni, tom 1. ISBN 88-7713-3209-5, 2000, p. 83.*
3. **Adressa: Chauenas, 7550 Scuol. Telefon: 081 864 90 71. Fax: 081 864 73 40. Posta electronica: planta.t@hotmail.ch. Internet: www.chauenas.ch.**
4. **Armon Planta, Verkehrswege im alten Rätien. Tom 4. Lectorat da Jürg Rageth. Cuira (Bündner Monatsblatt, ISBN 3 905241 06 4) 1990.**
5. **Kurt Wanner en: Armon Planta (sco nota 4), p. 9.**
6. **Pretsch da l'excursiun tras la Viamala e sur il Spleia: 505 francs per persuna. Inscriziun a scrit u per telefon (v. nota 3) trais emnas avant l'entschatta da l'excursiun, eventualmain cun pajament aquint da 250 francs per persuna.**